




Malaysia



Setem² Pos Kenang²an



MALAYSIA

Setem² Pos Khas yang berharga 10 sen, 12 sen dan 50 sen akan di-keluarkan pada Hari Malaysia menandakan kelahiran Malaysia.

Butir² berkenaan setem² yang akan di-keluarkan itu ada-lah saperti berikut :

Ukuran: Ukuran² jarak dari lubang yang di-hujung² setem ada-lah 36 mm × 25 mm (melintang) tiap² sa-keping sa-ratus setem.

Chara Chetak: Photogravure.

Gambar Hiasan: Merupakan sa-biji bintang dengan empat-belas runchingan yang chahaya-nya memancar di-wilayah² Malaysia.

Warna: 10 sen—Bintang dan wilayah² Malaysia berwarna kuning dan latar belakang-nya berwarna ungu.

12 sen—Bintang dan wilayah² Malaysia berwarna kuning dan latar belakang-nya berwarna hijau.

50 sen—Bintang dan wilayah² Malaysia berwarna kuning dan latar belakang-nya berwarna pirang tua.

Kertas: Kertas yang berchap bayang PTM.

Di-Chetak oleh: Harrison & Sons Ltd, London.

Tempoh Jualan: Tiga bulan dari tarikh pengeluaran-nya atau sa-hingga setem² itu habis, mengikut mana yang terdahulu.

Kemungkinan mengadakan persatuan politik antara Persekutuan Tanah Melayu, Singapura dan Wilayah² Borneo Utara, Sarawak dan Brunei telah mula²-nya di-shorkan oleh Yang Teramat Mulia Perdana Menteri, Persekutuan Tanah Melayu dalam suatu ucapan waktu makan tengah hari di-persidangan surat khabar di-Singapura pada 27hb Mei, 1961. Shor ini telah di-sambut dengan baik oleh Kerajaan British dan suatu undangan telah di-buat kepada Yang Teramat Mulia Tunku Abdul Rahman supaya datang ka-London pada bulan November, 1961 untuk mengadakan perbinchangan² yang bertujuan untuk mendapatkan persetujuan di-atas dasar-nya dan juga untuk menyediakan jalan bagi perundingan selanjut-nya dengan wilayah² Borneo. Sa-barang keputusan tiada mungkin terchapai dengan tiada ada rundingan terlebih dahulu dengan wilayah² Borneo itu.

Satu kenyataan bersama daripada Kerajaan British dan Kerajaan Persekutuan Tanah Melayu telah di-keluarkan. Kenyataan ini menegaskan bahawa penubuhan Persekutuan Malaysia adalah merupakan matlamat yang di-perlukan dan mengumumkan juga bahawa pendapat² penduduk² Borneo Utara dan Sarawak terhadap Persekutuan ini mesti di-tinjau dan di-pastikan. Sa-buah Surohanjaya untok melaksanakan kerja² ini dan untok membuat shor² telah di-tubuhkan.

Surohanjaya ini yang di-ketuai oleh Lord Cobbold sa-bagai Pengerusi-nya terdiri daripada 2 orang ahli di-lantek oleh Kerajaan British dan 2 orang lagi di-lantek oleh Kerajaan Persekutuan Tanah Melayu di-kenal dengan nama Persurohanjaya Cobbold. Minat dan perhatian penoh daripada orang ramai telah di-bangkitkan dan Kerajaan² Borneo Utara dan Sarawak telah mengeluarkan kertas² menjelaskan tujuan² surohanjaya ini serta menerangkan rancangan Malaysia dengan arti-kata yang sa-mudah²-nya supaya orang ramai dapat memahami soal² yang sa-benar-nya dan supaya fikiran dan pendapat mereka mengenai-nya dapat di-terima dan di-timbangan. Sa-chara tiada resmi pertukaran pendapat dan fikiran yang berkesan antara wakil² dari Persekutuan Tanah Melayu, Singapura, Borneo Utara, Sarawak dan pemerhati² dari Brunei telah di-adakan, ia-itu sa-bagai akibat penubuhan sa-buah Jawatan-Kuasa Perundingan dan Perpaduan Malaysia. Sa-buah salinan kertas Jawatan-Kuasa ini yang bertajok "Memorandum Mengenai Malaysia" bertarikh 3hb Februari, 1963 telah di-serahkan untok pertimbangan Surohanjaya Cobbold.

Surohanjaya Cobbold mula berkerja di-Kuching pada 12hb Februari, 1962. Semua orang yang ingin mengemukakan pendapat² dan fikiran² mereka di-jemput berbuat demikian. Lembaga Bandaran, Majlis Daerah, Parti² Siasah, Kesatuan² Sekerja, Pemimpin² Ugama, Ahli² Majlis Meshuarat Kerajaan dan Meshuarat Undangan, Ketua² Bumiputera, Pemimpin² Kaum dan orang² ramai telah memberi pendapat² mereka. Sa-banyak 2,200 surat dan memoranda telah di-terima. 50 perjumpaan telah di-adakan di-35 pusat yang berlainan. Perjumpaan² ini dan pendapat² yang di-beri telah di-anggap sa-bagai sulit. Penyata Cobbold itu telah di-terbitkan pada 1hb Ogos, 1962. Surohanjaya itu telah bersetuju dengan sa-bulat suara bahawa sa-buah Persekutuan Malaysia akan memberi faedah yang sa-baik²-nya bagi Borneo Utara dan Sarawak dan bahawa suatu keputusan pada dasar-nya hendak-lah di-buat dengan segera-nya. Sa-telah mengkaji Penyata ini dan dengan terchapai-nya persetujuan perchantuman antara Kerajaan Persekutuan Tanah Melayu dengan Kerajaan Singapura, maka Kerajaan British dan Kerajaan Tanah Melayu telah memutuskan pada dasar-nya ia-itu dengan terta'alok kepada undang² yang mustahak, Persekutuan Malaysia yang di-chadangkan itu hendak-lah di-wujudkan sa-belum 31hb Ogos, 1963.

Kerajaan Persekutuan Tanah Melayu dan Kerajaan British memutuskan hendak menubuhkan sa-buah Jawatan-Kuasa Antara Kerajaan mengandongi ahli² yang mewakili Kerajaan British, Kerajaan Tanah Melayu, Kerajaan Borneo Utara dan Sarawak. Tugas-nya ia-lah menyediakan susunan perlembagaan yang akan di-kanunkan, termasuk-lah jaminan² bagi memelihara kepentingan² khas Borneo Utara dan Sarawak berkenaan dengan perkara² saperti kebebasan beribadat, pelajaran, perwakilan dalam parlimen Persekutuan, kedudukan bangsa² bumiputera, imigresen, kewarga Negara

dan Perlembagaan Negeri. Jawatan-Kuasa Antara Kerajaan telah mengeluarkan laporan-nya menawarkan susunan perlembagaan dan pertadbiran yang tertentu bagi memelihara kepentingan² wilayah² baharu yang memasoki Malaysia dengan tidak menghinakan fahaman Kerajaan Pusat yang kukoh dan tepat itu. Penyata itu telah di-terima dan di-persetujui oleh Kerajaan² yang berkenaan dan shor² yang terkandung di-dalam-nya di-jad'kan bahan dan panduan bagi memasokkan Wilayah² Borneo dalam Malaysia.

Sementara itu perundingan² dengan Singapura telah juga di-jalankan bagi perchantuman Singapura dengan Persekutuan Tanah Melayu dan kemasokan-nya sa-bagai sa-buah negeri di-dalam Malaysia. Pembentokan perlembagaan dengan pindaan² yang di-kehendakki membahagikan kuasa² antara Kerajaan Pusat dan Kerajaan Negeri serta juga memberi kuasa penoh kepada Singapura di-dalam beberapa perkara tempatan telah di-persetujui. Tetapi peratoran² ini telah sekali lagi di-buat dengan tiada menyentoh dasar yang utama berkehendakkan Kerajaan Pusat Malaysia yang kukoh dan tepat.

Segala perundingan² yang tersebut di-atas telah selesai apabila di-tanda tangani perjanjian berkenaan dengan Malaysia di-London pada 8hb Julai, 1963. Sa-telah di-buat demikian munchul-lah Negara Malaysia yang baharu yang akan mengandongi ka-sebelas buah negeri di-dalam Persekutuan Tanah Melayu sekarang ini, Singapura, Borneo Utara (yang akan di-panggil Sabah apabila lahir Malaysia) dan Sarawak. Penubohan Persekutuan Malaysia merupakan penyatuan negeri² dan penduduk-nya yang sama² telah memutuskan untuk berbuat demikian dan untuk mengumpulkan hasil² dan kemungkinan² untuk kebaikan bersama.

Penubohan Persekutuan Malaysia akan membuktikan kechenderongan penduduk² yang berjuta² dalam negeri² yang masok dalam Negara baharu itu dan chita² mereka akan terchapai dengan sa-penoh²-nya. Harapan mereka ia-lah supaya dapat naongan dan pimpinan dalam sa-buah negara yang sa-benar²-nya berparlimen demokrasi dan yang akan dapat menjamin kehidupan mereka yang lebeh ma'amor dan bahagia pada masa yang kehadapan. Negara baharu ini akan mengmbil tempat-nya di-antara bangsa² dunia yang bebas serta menyumbangkan segala tenaga-nya bagi menchapai kerjasama, perasaan saling mengerti, antara segala bangsa dalam dunia ini. Malaysia akan juga membantu dalam perpaduan tenaga dunia bagi menghapuskan kejahilan, kepapaan, pertelingkahan dan kelaparan daripada sisi manusia umum-nya di-atas muka bumi ini.